

1 Yohane

Kekecac ackuazéc.

¹ Kekecac ackuazéc nalé hénihéniaiguc bec kerec imuac mia neňaň gezacninanéň niňaňij, nimma kicninanéň héňaňij waňu hémma méraninanéň késaosi wammianij. ² Waňu kekec imi mewinini nénécmimia waňec, waňu kekec hémbénaňa imi hémma héipucya wamma zéau énécmianziň. Kekec imi mia Maňgocguc kerec. Keru Maňgocnéň neňaň muru mewinini nénécmiyec. ³ Ini acguc niniguc ala kekec wamma kecbij niňac, nini kicninanéň hémma gezacninanéň momacnec niňaňij imuac mia zéau énécmianziň. Neňaň ala kekec imi Maňgoc zéma Naňa, Yesu Kristo iriguc momacnec. ⁴ Waňu kiwi yomi ségiséginina sécgémac niňac oziň.

⁵ Ackuazéc iwarunec nimma zéau énécmiziň imi yomuhuc, Anutu imi asacmararaň, siňi imi iwac muru komodia mén ménda hezac. ⁶ Neňaň Anutuguc ala kekec kecziň imuhuc zéma siňi qeriaiguc kenha waňanzijiguc neňaň imi ac ikora zéma ackuazéc héla ménda tohoanziň. ⁷ I eneyaoc asac mararaň qeriaiguc kecanzac imuac séc neňaň asac mararaň qeriaiguc kecanziňiguc neňaň imi neňaocnec ala kekec waňamuma kecni Naňa Yesu Kristo iwac sacnéň kápésicnina moczoň zuac nénécmimac. ⁸ Neňaň kápésicnina qahac zéziňiguc neňaocnec ikoc waňamuziň,

imuac niḡac ackuazéc héla imi ewa qerini-naiguc ménda he nénécmizac. ⁹ Képésicnina zé auziḡuc, Anutu, méḡzé méḡzéya qahac, solaḡa miḡinanéḡ képésicnina waima birianina moczoḡ zuac sorocgé nénécmimac. ¹⁰ Waḡu neḡaḡ képésic ménda waḡanzḡiḡ zéziḡiḡuc, Anutuac ikora zémiziḡ. Waḡu iwac ackuazéc imi ewa qerinaiguc ménda hezac.

2

Héipuc icnina Kristo.

¹ Nambérac soroc hécna, ini képésic ménda wammu niḡac kiwi yomi o énécmizua. Waḡu méḡ képésic wammaciguc, neḡaḡ héipuc ic saiwa waḡ nénécmima zéanzac imi Maḡgocguc keczac. Iwac qara imi Yesu Kristo, solaḡa miḡina. ² Inéḡ mia neḡaḡ képésic niḡac doenina memaḡ zé séwiya wai nénécmiyec. Waḡu imi nonac sac qahac, néḡ baec séc ic embac momac yanda neḡaḡ niḡac imuhuc waḡec. ³ Neḡaḡ iwac héna ac tohoma waḡanzḡiḡuc haka imi hémma i nimmianzḡiḡ imi niḡ asarianzḡiḡ. ⁴ Ic méḡnéḡ ni i nimmizua zéma iwac ackuazéc ménda tohozac imi ikoc ic wanzac. Waḡu qeriaiguc ackuazéc héla ménda hezac. ⁵ Ic méḡnéḡ méḡ iwac ackuazéc tohoma kecancaciguc, Anutuac goi héihéinéḡ iwac ewa qeriaiguc hélacnec solaḡanima hezac. Imuac mia nini dimuhuc iwac qeriaiguc kecziḡ imi niḡasarianzḡiḡ. ⁶ Méḡnéḡ méḡ iwac qeriaiguc keczua zéanzac iminéḡ Yesu waḡec imuac séciḡuc wammac.

Héna ac qelia.

⁷ Goi héihéiac buṅa ini, héná ac ni o énécmizua imi qelia qahac, imi wahala. Ini hénihénia igucnec késa kecanzu imi mia. Héná ac wahala imi ackuazéc ini becarunec niṅanzu imi mia. ⁸ Siṅi imi kemmanec keru, asac mararaṅ héla imi bec asariyu, héná ac imuac héla imi Yesu zéma sugginaiguc hicṅi asariyu héṅiac héṅanzua. Imuac niṅ ni héná ac imuac héná ac qelia zéma méṅgucnec o énécmizua. ⁹ Méṅnéṅ méṅ asac mararaṅ qeriaiguc keczua zéma alayawac ewa hazéc wammianzac imi siṅi qeriaiguc keczacnec. ¹⁰ Alaya goi héihéi wammianzac iminéṅ asac mararaṅ qeriaiguc keru iwac qeriaiguc iwawai biria méṅnéṅ hema wammiyu éréc étéṅ wammacac séc qahac. ¹¹ Waṅu méṅ alayawac ewa hazéc wammianzac imi siṅi qeriaiguc kecma imuac qeriaiguc keṅha waṅanzac imuac niṅ siṅinéṅ kiwa nézicgéyu dimuaru kemmac imi ménda ninzac. ¹² Nambérac hécna, Yesuac qara niṅac onac késpedesgina wai énécmidaczac hénia imuac niṅac mia kiwi yomi o énécmizua. ¹³ Maṅgoc ini i nalé hénihénia igucnec kecanzac imi nimmigic hénia imuac niṅa kiwi yomi o énécmizua. Sac qelihécna ini Biria miṅina imi ogicgic hénia imuac niṅac kiwi youmi o énécmizua. ¹⁴ Nambérac hécna ini Maṅgoc nimmizu hénia imuac niṅac kiwi yomi o énécmizua. Maṅgoc ini i nalé hénihénia igucnec kecanzac imi nimmizu, hénia imuac niṅac kiwi yomi o énécmizua. Sac qelihécna, ini kucginaguc waṅu Anutuac ackuazéc qeriginaiguc naṅu Biria miṅina ogicgic, hénia imuac niṅa kiwi yomi

oénécmizua.

Baecac iwawai niḡac siḡ ménda nimmu.

¹⁵ Baec zéma iwawai imuaru hezac imuac goi héihéi ménda wammimu. Méḡnéḡ méḡ baecac goi héihéi waḡ mianzaciguc iwac qeriaiguc Anutuac goi héihéi imi ménda hemizac. ¹⁶ Némac niḡ? Baeciguc iwawai hezac imi moczoḡ séwiac siḡ, kicac siḡ zéma iwawai késa keczu me waḡanzu imuac séwi eḡeḡ wanzac. Waḡu imi moczoḡ Maḡgocarunec qahac, néḡ baec igucnec. ¹⁷ Baec zéma imuac siḡ imi qahac wammac, néḡ méḡnéḡ méḡ Anutuac ackuazéc tohoma keczac iminéḡ tetcgia qahac kecanzac.

Kristoac hazéc.

¹⁸ Nambérac hécna nalé yomi imi nalé tetcgia. Kristoac hazéc hamacac niḡ zézéya imi niḡic imuhucyanec deguc Kristoac hazéc sasala bec hama keczu. Imuac niḡ nalé tetcgia wanzac imi niḡasariziḡ. ¹⁹ I eneḡ nonarunec hicḡima keḡic. Néḡ nonac kitic hécnina qahac. Kitic hécnina wambunec imi niniguc kecbunec. Waḡu kitic hécnina qahac imuac hénia imi nénézégic héḡtegicbiḡ niḡac waima keḡic. ²⁰ Téréya miḡinanéḡ ini Uḡa Téréya haléc ésécnec qocgé énécmiyu megic. Imuac niḡac ini moczoḡ niniḡinaguc wanzu. ²¹ Ini ackuazéc héla ménda niḡzu zéma kiwi yomi oénécmizua imuhuc ménda zéma nimmu. Imi qahac, néḡ ini imi ackuazéc héla imi niḡtegicgic, waḡu ikoc imi ackuazéc héla igucnec ménda hicḡianzac imuac niḡ kiwi yomi oénécmizua. ²² Mérenéḡ ic ikora? Méḡ Yesu imi Kristo qahac zéanzac imi mia. Ic imuhucyanéḡ

Kristoac hazéc héla. Inéj Maᅅgoc zéma naᅅa qaecgé érécmianzac. ²³ Ménéj Naᅅa imi ménda ninzénégzac iwaru Maᅅgocya qahac, néj ménj Naᅅa imi ninzénégzac inéj Maᅅgocyaguc keczac. ²⁴ Héna igucnec iwawai gezacginanéj niᅅgicac niᅅgic imi qeriginaiguc hezac me qahac imi hémma niᅅtgicgic. Imi heyuguc ini imuhucyanec Naᅅa zéma Maᅅgoc qerigiraiguc kecmu. ²⁵ Sisipac ac inéj waᅅ néncmiyec imi kekec hémbénaᅅa néncmimiawac zézé seli imi mia.

²⁶ Ac imi ikoc waᅅ énécmianzu ionac niᅅa imuhuc oénécmizua. ²⁷ Ini iwarunec Uᅅa téréyawac haléc naec naec meᅅic qeriginaiguc keczac imuac némaciguc méᅅnéj ku énécmimacac niᅅ wambunec? Iwac Uᅅa téréyawac halécnéj météré énécmimia iminéj iwawai moczoᅅ ku énécmimac. Uᅅawac ara imi hélanec, ikora qahac, imuac eneᅅ ku énécmianzac imuac séc iwac qeriguc kecmu.

Anutuac nambérac héra.

²⁸ Nambérac hécna deguc iwac qeriaiguc kecgic Yesunéj wininima mayu iwac kiwaiguc gamunina ménda nimma ewa bénzénj wambij. ²⁹ I solaᅅa miᅅina waᅅanzac imi ninzuiguc ic ménj solaᅅa waᅅu hémma iwarunec hicᅅizac imi nimmu.

3

¹ Ninzu! Kurumeᅅ Maᅅgocnéj Anutuac nambérac hécna zé néncmimaᅅ zé goi héihéi dimuhucya waᅅ néncmiyec! Waᅅu nini imuhuc mia keczij. Waᅅu baec ic embac ieneᅅ

i ménda héntegicanzu, hénia imuac niñ nini acguc ménda ninic tegicanzu. ² Soroc hécna neñañ deguc imi Anutuac nambérac héra kecziñ. Bian dimuhuc kecbiñ imi ménda hicñi asarizac. Wañu inéñ wininiyu neñañ iwac kekec tanera hezac séc hémbiñ imuac niñ neñañ iwac kekec tanera imuhucyanec mia wamma kecbiñ imi ninziñ. ³ Méñnéñ méñ eñeya ewa qerianéñ kekec imuac mambéc kecanzac imi Yesu qakola qahac qala qala wanzac imuhucyanec eñeya météré amuanzac.

⁴ Méñnéñ méñ késpedesic wañanzac imi hénac ac lo-gianzac. Késpedesic imi hénac acac sigisigiya. ⁵ Wañu Inéñ késpedesicnina nonagicmañ zé wininiyec imi ini ninzu. Wañu iwaru késpedesic méñ ménda hemizac. ⁶ Méñ iwac qeriaiguc kecanzac iminéñ késpedesic ménda wañanzac. Méñ késpedesic wañanzac iminéñ i méñ ménda hémma nimmima keczac. ⁷ Nambérac hécna méñac méñ ménda waigic, ikoc wañ énécmiwac niñac. Haka dindiña wañanzac iminéñ i solaña keczac séc solañanec kecanzac. ⁸ Biria miñinanéñ hénihéniya igucnec késpedesic wamma hama kerec. Imuac niñ méñ késpedesic wañanzac imi Biria miñina iwarunec. Anutuac Naña inéñ Biria miñinawac ai imi mebirimañ zé wininiyec. ⁹ Méñnéñ méñ Anutu arunec hicñima keczac imi Anutuac ac gocmianéñ iwac qeriaiguc hekeru késpedesic ménda wañanzac. Anutu arunec hicñima keczac imuac niñac késpedesic wamma kecmacac séc qahac. ¹⁰ Anutuac nambérac me Biria miñinawac nambérac imi hénia yomuhuciguc hicñi asariyu niñanzñ; Méñ haka dindiña ménda

wanzac imi Anutu arunec qahac. Méñ alaya goiya ménda héianzac imi acguc Anutu arunec qahac.

Goi héihéi wañamuwiñ.

¹¹ Ackuazéc yomi ini hénihénia igucnec nimma keczu; Goi héihéi wañamuwiñ. ¹² Kainac haka ésécnec ménda wañgic. Inéñ Biria mininawac buña kecma munaya qeyu humuyec. Wañu némac niñ qehumuyec? Eñeya wawañ meme biria, wañu munayawac wawañ meme imi hiabia wañu nimbupuc nimma qehumuyec. ¹³ Dacmuna hécna zéma embac nañhécna, ini baecac ic embac eneñ mézétiti wañ énécmigic ménda aurimu. ¹⁴ Neñañ goi héihéi wañamuazñiñ imuac mia nini humuc waima kekec qeriaiguc kerenziñ imi ninziñ. Méñ tosara ionac goigina ménda héianzac imi humuc qeria igucnec keczac. ¹⁵ Méñ dacmuna héra me nañhéra goigina ménda héianzac imi ic qeque. Wañu ic qeque iwac qeriaiguc kekec hémbénaña ménda hemizac imi ini ninzu. ¹⁶ Yesu Kristonéñ neñañ niñac wamma kekecyá waiyec. Wañu neñañ goi héihéi héla imi ninziñ. Neñañ acguc dacmuna hécnina ionac niñac wamma kekecnina waiwiñac hezac. ¹⁷ Ic méñnéñ baecac iwawaiya sasala késa kecma ninzéñ ninzéñ dacmuna méñnéñ iwawai méñ niñac osiyu hémma ewa biric ménda wammimac imi Anutuac goi héihéinéñ dimuhuc iwac qeriaiguc hemac? ¹⁸ Nambérac hécna ac me ezelañnéñ sac qahac, wawañ meme zéma ewa qeri hélanéñ goi héihéi wañamuwiñ.

¹⁹ Imuhuc wambiniñguc neñañ ackuazéc héla imuaru qékétama keczñiñ imi asariyu

nimbiñ. Wañu Anutuac wésiaiguc ewa qerina meseligima qeri bénzén kecbiñ. ²⁰ Ewa qerininanéñ késpedes ninaguc zénénéc mimaciguc imi Anutuac ewa qerianéñ ic neñañ qerininawac séc qahac, Inéñ séc méñ kecma iwawai moczoñ nindacanzac. ²¹ Kokoc soroc hécna qerininanéñ késpedes ginaguc zéma ménda zé nénécmiyu Anutuac kiwaiguc bénzén kecbiñ. ²² Wañu iwac héna ac tohoma iwac kiwaiguc iwac ewa siñ méndacma haka silic wanní, Inéñ zéwelec welecna nimma melenju iwawai moczoñ hia mewiñ. ²³ Iwac héna ac imi yomuhuc; Naña Yesuac qara ninzéngeña héna ac Inéñ nénécmiyec imuac séciguc goi héihéi wañamuwiñ. ²⁴ Ic embac enéñ iwac héna tohozu ieneñ iwac qeriaiguc keczu, wañu ionac qeriginaiguc Inéñ keczac. Uña Téréya nénécmiyu qerinaiguc keczac Inéñ zéasariyu neñañ qerinaiguc Inéñ keczac imi niñanzíñ.

4

Uña hia me uña biria imi gésima héñtegicma nimbiñ.

¹ Kokoc soroc hécna, kua meme ic ikora sasala baeciguc hicñima keczu. Imuac niñ uña moczoñnec ménda ninzéngeñmu. Uña imi Anutu arunec me qahac imi niñyacgeñañ zé ala batuc wañ énécmimu. ² Anutuac Uña imi yomuhuciguc niñtegicmu; Uñaya uñaya Yesu Kristo baec ic héla wamma hayec imi ninzéngeñanzac iminéñ Anutu arunec hahaya wanzu. ³ Wañu uña méñnéñ méñ Yesu ménda ninzéngezac imi Anutu arunec

qahac. Imi Kristoac hazéc boňawac uňa. Hamac zéyu niňgic Kristoac hazéra imi mia. Waňu imi bec baeciguc hicňima keczac. ⁴ Nambérac héčna ini Anutu arunec. Qeriginaiguc keczac Inéň méň baeciguc keczac i qema ogicdarec, imuac niňac eneň hazéc hécgina unuma onogiczu. ⁵ Ieneň imi baec igucnec, imuac niň ac suruc baec igucnec imi zégic baec ic embac ieneň ac imi nimma tohoanzu. ⁶ Neňaň mia Anutuac buňa, imuac niň méň Anutu ninzac inéň acnina niňanzac, néň méň Anutu arunec qahac inéň acnina ménda niňanzac. Ackuazéc hélawac uňa me ikocac uňa imi hénia imuhuciguc héňtegicanziň.

⁷ Kokoc soroc héčna neňaň goi héihéi waňamuwiň. Goi héihéi imi Anutu arunec imuac niňac méň goi héihéi waň énécmianzac inéň Anutu arunec hicňima kecima Anutu ninzégéanzac. ⁸ Anutu eňeyaoc imi goi héihéiac miňina, imuac niňac goi héihéi ménda waň énécmianzac inéň Anutu ménda ninzac. ⁹ Anutuac goi héihéi imi sucninaiguc yomuhuc hicňiyec; Anutunéň Naňa momacguc imi méliyu baeciguc mayec imi neňaň iwarunec kekec héla mema kecbiň niňac. ¹⁰ Goi héihéiac hénia imi yomuhuc hezac, neňaoc Anutu goi héihéi wammiyiň imi qahac, Anutu eňeyaoc goi héihéi waň nénécmima neňaň késpedesnina mulu memac niňac Naňa méliyu mayec. ¹¹ Kokoc soroc héčna Anutunéň imuhuciguc goi héihéi waň nénécmiyec, imuac niň imuhucyanec neňaň goi héihéi waňamuwiň. ¹² Ic méňnéň méň Anutu ménda héñec, néň goi héihéi waňamuwiňiguc Anutu I eňeyaoc

neňaň ewa qerinaiguc keczac. Keru iwac goi héihéianéň neňaň qerinaiguc solañanima hemac.

¹³ Inéň Iwac Uňaya nénécmiyec imuac niň Inéň neňaň qerinaiguc, neňaň iwac qeriaiguc kecamuanziň imi ninziň. ¹⁴ Maňgocnéň baec séc ic embac humuc igucnec nénépésimac niň Naňa méliyu mayec imi nini hémma héipuc wamma zéziň. ¹⁵ Méňnéň Yesuac niňa Anutuac Naňa zéma nimmiyu Anutunéň iwac qeriaiguc, inéň Anutuac qeriaiguc kecamumaoc. ¹⁶ Imuhuc wamma Anutuac goi héihéi neňaň muru hezac imi hémma ninzégéma keczin.

Anutu imi goi héihéiac miňina, méň goi héihéiac qeriaiguc keczac imi Anutuac qeriaiguc keru Anutunéň iwac qeriaiguc keczac. ¹⁷ Imuhuciguc goi héihéinéň neňaň sucninaiguc solañanimac. Waňu baec yomuac qeriaiguc iwac kekecyá ésécnec kecanziň imuac niň gésigési nalé yandaiguc bészéň nambin. ¹⁸ Bac yandiyandi imi goi héihéi qeriaiguc ménda hezac. Waňu goi héihéi hélanéň bac yandi yandi imi nesiyu keňanzac. Némac niň, bac yandi yandi iminéň bakia zérabéráguc imuac buňa, ic méň bac yandi yandi waňanzac imi goi héihéiac qeriaiguc ménda solañanima kecanzac. ¹⁹ Inéň goi héihéi walac waň nénécmiyec imuac niňac neňaň goi héihéi waňamuwiň. ²⁰ Méňnéň ni Anutu goi héihéi wammianzua zéma nauň dacmuna héra mézétiti waň énécmimac ic imi ikoc ic. Némacniň, méň nauň dacmuna héra kicnéň inic inira ionac goi héihéi ménda waň énécmianzac imi eneň Anutu

ménda héhéŋa imi goi héihéi hia ménda wammimac. ²¹ Inéŋ zézé seli ac yomi nénécmiyec; Mén Anutu goi héihéi wammianzac iminéŋ nauŋ dacmuna héra goi héihéi kileŋ waŋ énécmimac.

5

Yesu imi Anutuac Naŋa.

¹ Ménéŋ mén Yesu imi Kristo zéma ninzéŋgézac, inéŋ Anutu arunec hicŋima keczac. Waŋu ic ménéŋ mén Maŋgoc goi héihéi wammianzac inéŋ iwac naŋa momacnec goi héihéi wammianzac. ² Neŋaŋ Anutu goi héihéi wammima iwac zézé seli ac tohoma imuacnec mia Anutuac nambérac héra goi héihéi waŋ énécmianziŋ imi asariyu niŋanziŋ. ³ Anutuac zézé seli ac tohoanziŋ haka iminéŋ mia Anutu goi héihéi wammianziŋ wawaŋ meme imi mia wanzac. Waŋu iwac zézé seli ac imi yéwéria qahac. ⁴ Mén Anutu arunec hicŋiyec imi baecac ala batuc qema ogicanzac. Waŋu baecac ala batuc qema ogicanziŋ ogicogic imuac kuha imi ninzéŋ ninzéŋnina. ⁵ Ic mén Yesu imi Anutuac Naŋa zéma ninzéŋgézac i qahac zéwiŋnec méréneŋ baecac ala batuc imi hia qema ogicbacnec?

⁶ Doku igucnec zéma sac igucnec hayec imi mia Yesu Kristo. Doku igucnec sac qahac, néŋ doku zéma sac igucnec hayec. Uŋa Téréya, ackuazéc héla zézéac miŋina wanzac imuac niŋac Uŋa téréyanéŋ héipucya wanzac. ⁷ Imuac niŋ haréwécnéŋ héipuc wamma zéanzu. ⁸ Imi mia Uŋa Téréya zéma doku zéma sac, haréwéc iminéŋ momacnec Yesu imi ic héla zézu. ⁹ Neŋaŋ ic

embac onac héipuc ac imi ninzéhégéanzij, waŋu Anutuac héipuc ac imi kuha ogicogicya wanzac. Anutunéh naŋawac yomuhuc héipuc wamma zézac imuac héipuc ac yominéh Anutuac héipuc ac wanzac; ¹⁰ Méné Anutuac Naŋa ninzéhégéanzac inéh héipuc imi eŋeya qeriaiguc késa keczac. Waŋu mén Anutu ménda ninzéhégéanzac inéh Anutuac ikora zémianzac tanec wanzac. Némac niŋ, inéh mia héipuc Anutunéh Iwac Naŋawac waŋec imi ménda ninzéhégéanzac imuac niŋ imuhuc zézua. ¹¹ Héipuc ac imi mia yomuhuc; Anutunéh kecec hémbénaŋa nénécmiyec waŋu kecec hémbénaŋa imi Iwac Naŋawac qeriaiguc hezac. ¹² Ménéŋ Naŋaguc keczac iminéh kecec hémbénaŋa mema keczac. Ménéŋ Anutuac Naŋa ménda késama keczac iminéh kecec hémbénaŋa imi ménda késa keczac.

¹³ Ni ackuazéc yomi onaru kecec hémbénaŋa imi he énécmizac imi niŋtegicmu niŋac ic embac Anutuac naŋa Yesuac qara ninzéhégézu onac mia kiwi yomi oénécmizua. ¹⁴ Nini Anutuac yomuhuc ninzéhégéma ewa déŋ wamma keczanzij; Iwac ewa siŋ tohoma iwawai ménac mén qesimiwiŋ imi hia niŋ nénécmidacmac. ¹⁵ Inéh niŋ nénécmianzac imi ninzéhiguc iwawai ménac mén welecmianzij imi bec nénécmizac imi ninzij.

¹⁶ Ic ménéh alaya ménéh késpedes humucac buŋa séc ménda wawaŋa imuhucya waŋkeru hémmaciguc iwac niŋac wamma Anutuaru welecmimac. Késpedesira humuc ac buŋa séc qahac waŋu Anutunéh kecec héla mimac. Késpedes humuc mihicŋi mimia hemizaciguc imuac

zéwelecmimu niñac ménda zézua. ¹⁷ Héna ac logilogi imi moczoñ késpedesic wanzac, néñ késpedesic tosara imi humuciguc ménda onagicma kemmac.

¹⁸ Méñ Anutu arunec hicñiyec inéñ késpedesic ménda wañanzac imi nini ninziñ. Némac niñ, Naña Anutu arunec hicñiyec i imi Inéñ héñgaleñ wammiyu Biria miñinanéñ ménda késa osi wammimac. ¹⁹ Neñañ imi Anutu arunec hicñima kecziñ, néñ baec ic embac tosara imi Biria miñina iwac qeriaiguc kecanzu imi neñañ ninziñ. ²⁰ Anutuac Naña mama hama niñtegiç qinñtegiç nénécmiyu neñañ ac héla miñina imi nimmima iwac qeriaiguc kecanziñ. Kecma naña Yesu Kristoac qeriaiguc acguc kecanziñ. Wañu Yesu Kristo inéñ Anutu héla zéma kekec hémbénaña keczac. ²¹ Nambérac hécna héñgaleñ wañamuma baniarawac ireha igucnec néñgacma lakec kecmu.

SISIPAC AC QELIA
The New Testament and Psalms in the Kube Language
of Papua New Guinea
Buk Song na Nupela Testamen long tokples Kube long
Niugini

copyright © 2012 Global Bible Translators

Language: Mongi (Kube)

Translation by: Global Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-23

PDF generated using Haiola and XeLaTeX on 21 Feb 2024 from source files dated 31 Aug 2023

0403b50f-078d-52e2-a203-056e8a430665